

摘藻堂四庫全書薈要

集部

欽定四庫全書薈要卷一萬五千七百五十五

集部

盤洲文集卷五

宋 洪适 撰

詩六十九首

奉使道中次韻會亭

平野風煙濶孤村父老存薄雲低故堞落日逐輜軒分
裂時云久澄清敵未吞春光滿花柳天道竟何言

過穀熟

玉帛齊盟亦可尋東風著面客塵侵隋堤望遠人烟少

汴水流乾轍迹深桃李不言應感舊山川無主祇傷今
遺民久厭烽烟苦辟國謀乖負此心

次韻馬上偶成

天遣祥風掃塞氛越疆輶傳禮儀新禦戎可鑒秦無策
覘國誰夸鄭有人鳴鶴九臯聞徹響翔龍千載仰攀鱗
垂鞭日日陪清話談笑成章泣鬼神

次韻車中倦吟二首

舊國於今作兩家鄰翁有酒不能賒明朝又逐歸鴻去

祇有塵埃滿一車

叱馭寧辭歷險難
投戈且幸邇遐安
羶車軒簸長危坐
恰似舟行八節灘

次韻初入東京二首

乾坤正欲稔天驕
會見偕來款聖朝
蓄銳乘機先自治
莫令武庫五兵銷

五門雙闕未央城
碧瓦朱甍雲霧生
真主南巡正嘗膽
從今瞻仰泰階平

過黃河用上介龍深甫遷居舊韻

風埃如霧滿川黃
馬上朝來識太行
水瀉濁河橋甚壯
沙連遠塞路何長
皇華復講衣裳會
京闕今為瓦礫場
夾道桑麻過千畝
野花時有一枝香

絕句

宣防瓠子遠西京
向者河堤役不寧
萬事任教流就下
始知談舌悞朝廷

次韻北使邀觀常豐湖

一派澄湖何處來
鳴榔漁子聚還開
主人甚顧他鄉客

莫使歸途欠一杯

此處欠一杯
蓋北使語

次韻初望太行山

曾巒逾碣石形勝鎮神州
可惜羊腸險今持虎節遊
天心端有待人力豈能謀
未老如憑軾壺漿為曲留

次韻伊洛道中

萬里修鄰好鉦鼙久不聞
邊鋒方兩解春事已平分
發軔雞三唱揮毫酒半醺
問途殊未已返顧羨歸雲

次韻湯陰寒食遇雨

殊方遇寒食節物負年華
小雨偏宜柳輕風未落花
見錫如隔嶺對月共忘家
俗重之推廟誰祠萬里沙

次韻講武城

漢鼎三分霸業成并吞猶未戒
佳兵故城四壁存陳迹
荒冢千年斷樂聲何必枕戈防
詭計豈容橫槊竊詩名
我來弔古停車轍壟上農人也
輟耕

次韻趙州石橋

訪古汶河上聊忘道路勞
仙蹤嘗策蹇海怪或鑄鼇
濟遠徒杠小憑虛亂石牢
何時父老集一奏太平謠

過中山

三關標重鎮自昔護邊陲
觀者堵牆立紛然簾幙垂
欲謀千日醉恐悞十旬期
可喜中庭月何妨盡一卮

過保州

藝祖粉榆社唐人保塞軍
百年誇重地今日對斜曛
故老垂黃髮妍姬豔綵裙
白溝才一舍何計可中分

次韻早行

夙駕星光動徐行霧氣迷塞鴻翻月去邊馬向風嘶
柝靜譙門曉輪欹沙路低頗思眠蕙帳枕上聽鄰雞

次韻得保州老張瓦研

毛穎傳既成陶泓名不朽陳楮接武來論交篇籍囿千
年銅雀臺瓦解淪坤厚何人澄其泥頗能髣髴否龍公
天上客金蘭幸同臭結束萬里行聯翩五旬久清談落
玉塵痛飲盡金斗咳唾珠璣粲揮翰不停手窮邊得佳

硯可出老呂右瓦缶莫雷鳴龍尾羞牛後

次韻保州聞角

覺來屈指數修程歷遍中原長短亭誰向城頭晚鳴角
邊音嘈囋不須聽

邊音嘈囋不須聽整頓征衫待啓明已把哀笳變清角
惜無古調奏韶英

次韻梁門

雙壘依然柳作陰故壘行盡倍傷心時平且得無爭戰

苔上戈槍卧綠沈

次韻白溝河

唐餘畫壤媿鴻溝
西閉關門漢道柔
一自旄頭入京洛
至今泉水不東流

次韻回程至涿鹿

回首燕然日再西
一杯相屬使軺歸
殘花媚野不妨好
倦鳥投林自在飛
可惜光陰銷客枕
不嫌塵土染征衣
大明退直清和日
已約梯雲訪翠微

燕館日鐸得四鴈籠之以歸

提攜垂鴈脫庖丁等待他年羽翼成
唳月摩雲須有便莫教更作不能鳴

次韻楊花二首

桃花開落不同時燕子銜泥相伴飛
若向章臺問春色可無清淚濕征衣

官路風輕落絮迷望中高下雜游絲
糝羶擬雪春無際只有騷人聖得知

再至保州

再入中原境相迎有莫鷗柔桑新迸葉高柳細吹花短
後衣何健長空雁易斜指期淮可渡寧歎在天涯

次韻再至中山

路指中山國人歸折木津終風震簷瓦細雨壓車塵落
紙詩章速開尊酒力醇無功慚報國來往謾勞人

次韻中山雨後

好雨連宵鳩喚晴曉行襟袂有餘清遠遊朔塞殊風景

夢到東阡看火耕
紅退桃溪三月晚
綠添麥隴一川平
纖塵不逐車輪起
喜聽驅驢叱馬聲

次韻村店得牡丹

花品稱王擅洛京
朱朱白白莫齊名
相逢河朔春將暮
半吐檀心若有情

次韻陳留聞鶯

恰恰啼鶯馬上聽
凝雲欲雨曉寒輕
滿郊碧草皆春色
祇欠山光與水聲

次韻寧陵憩驛

野外人聲寂林間鳥羽翻
朱櫻喜堆案青杏助開尊
故國多荒草遺黎有怨言
雨餘塵土靜不復污歸軒

次韻南京道中

密葉成陰行路寬
鳩鳴鷺轉足開顏
半塗泥滑夜來雨
數片雲飛何處山
薄暮每尋樽俎共
殘春能伴節旄還
塵襟好濯西湖水
偷取禪房一日閒

次韻遊臞菴不果

水紋如穀送歸船漸近觚稜尺五天適意尊鱸公有興
尋盟鷗鳥我無緣遠懷並轡穿紅皺近阻攜筇款碧鮮
却待湖山最高處醉中一笑挹臞仙

寄別景盧

禹穴遺書不可尋坐看綠葉再成林千巖競秀非吾土
三徑就荒勞我心誰是周人思召伯今無老叟出山陰
台堦穩上添花萼時倩來鴻續好音

藍憲遣人往吳門移落花未至而去

雒京隔絕花難得茂苑移將信已通
世事好乖猶獻鵠
雕欄不用怨東風

新壇巧斲列東西准擬看花倒接羅
交臂失之端可笑
儻來外物盡難期

三春桃李家家有不費陽和特地恩
名品異芳天亦靳
未教容易到丘園

登芝榭見景廬所增月臺

臺榭相望聞語聲
如芝觀月有餘清
旁連小隱分三徑

細數修篁限一城日日杖頭思徑醉年年鐺脚玩欣榮
誰人知我歸與樂趁此登臨未憚行

許倩報白榴已得玉茗未諧以詩趣之

萬里移根安石國何年傅粉未知名須邀玉茗來巖壑
便結瓊花作弟兄詩客定疑天外得園人已辨牕前迎
東家阿措休相妬不學穠粧照眼明

次韻景盧喜得安州牡丹

洛中花信已沈聲涇渭寧分濁與清近出黥山空接壤

徽州雖出牡丹
吾鄉亦難致

遠來安陸比連城
虛壇僅免遊人問浪

藥從教著處榮更欲丁寧新芍藥

維揚新送芍藥五十本

莫誇多

少便橫行

次韻景盧野處解嘲之什

地偏不接市廛聲
古木參天鶴唳清
臺榭迥窮千里目
詩章突過五言城
花移瓊樹真無敵
酒換金貂未足榮
燈火歸時笙管作
解嘲何事有歌行

再賦

幽壑藏雲水作聲
紉蘭入室好風清

雲壑蘭室皆野處所名

高蜚

便有縹縹意進築如開蕩蕩城百尺樓成同日涉四時
花發匪朝榮園池如許誰言小但放芻蕘雉兔行

酬景盧賦圃中種菊移花

甕頭玉友已銷聲
小試山齋百末清
十客對花休避席
千奴呼摘擬專城
微霜到處葉未落
小雨移來根易榮
情話團欒亦終日
坐中惟欠十般行

景孫有小鬟解作此戲是日不至

酬景盧謝菊

涉秋無復滴堦聲
夜雨隨風塵已清
平日愛山營一壑
老來學圃列三城
園夫種樹元無術
籬菊分叢獨晚榮
躡屐問花兼問柳
不須垂毳可泥行

荅景虛

鴈翅齊飛有雋聲
文章何止賦華清
誰教短策長尋壑
不擁高牙且典城
臺省向來非獨冷
身名此日已俱榮
盈旬詩軸牛腰大
抱牘須同饗吏行

病酒

三日惟聞煮藥聲一中可怕聖之清
移花種竹已得地
逢酒當歌須閉城
遠避霜風嚴北戶
靜看朝日滿東榮
雙螯退步輸年少
誰與抽琴作蟹行

答景嚴

向來戎馬沸邊聲
曾出良籌助掃清
六載倦遊潛楚澤
一枝同折記欒城
北門西府仍班綴
後鴈前鴻媿寵榮
兩鬢星星吾老矣
看君重上赤墀行

景嚴送冬杏

蒼頭呼夢雜雞聲
蕊杏詩來句轉清
獨傲風霜愛冬日
不隨桃李媚花城
一枝得得能相對
凡卉紛紛孰並榮
大隊開時春且盡
醉吟當續麗人行

景盧送瑞香

翠幄藏春巧寄聲
熏籠織錦曉天清
幽香端是花中瑞
仙派初來塵外城
酒海何妨三雅進
鬢雲誰稱一枝榮
兩來頓使鄰牆遠
不到闌干深處行

野處有詩羨山居
小隱之廣而有拓地不可之

歎

敗葉翻風策策聲
山根可掬石泉清
東鄰美舜久成塢
北陌新柑小築城
臺在家邊來更好
地連郭外得非榮
曾樓縱目無窮景
安用垂涎杖屨行

再賦

厭聽朱絃裂帛聲
攜鋤斲壑賦臨清
賞心盡得難并景
舒足休嫌踏破城
夜壁朝瓊寧獨樂
春蘭秋菊豈爭榮
閉關不使高軒過
只許漁樵為輔行

周智光鎮華州嘗
曰夜眠不敢舒足

恐踏破
長安城

憶城東來禽

為景孫弟

遠送來禽我獨無
後來纔得兩三株
隱園野處花難比
祇恐人評棣萼圖

憶古城柿

為景陳弟

果園幽僻少能知
丹柿烏桕手自移
欲學鄭虔書墜葉
何人解有寄來時

憶隆庭竹

為魏彥成

聞道隆庭竹滿園許分蒼翠長兒孫看看冬盡無消息
始信莊周是寓言

憶吳中洛花

為藍叔成

書郵浸失鱗鴻約欄檻長教蜂蝶猜待擬子虛烏有賦
東賓仍遣耳孫來

戲陳孫二弟

城東卜築有期無須為簷楹動百株可忍非時歸爨下
合尖何似助浮圖

古城栽種畏人知，定是根盤不可移。

酉陽雜俎：木中根固，柿為最，俗謂之

盤柿車載斗量，裨販走果綱，却有入州時。

傍嶽經營雜果園，翻愁他日逐王孫。不如種竹招風月，此意難逢俗子言。

林居草創名花少，柳徑苔生過客猜。不管空言無實惠，只嫌巧取近嗟來。

再賦

外求它壤曾攀桂，近捨家園尚守株。待得枝頭如赤柰，

廣志林禽
花似赤柰
却來看我百花園

圃在前村若箇知
山逢愚叟會須移
前言戲耳君休怪

七絕成陰自有時

雜俎柿
有七絕

何人種柳成門巷
幾處看花到子孫

高適詩門前種柳
成深巷羅鄴詩買

栽池館愁无地看
到子孫能幾家

且盡山齋一杯酒
此君相對已忘言

長慚無地起樓臺
覓果尋花頗受猜
且向園林聊寓意
不教絲管逐人來

送景盧

涉世難防犬吠聲放懷安可俟河清昂霄莫辨千尋木
鑿牖聊看三里城丹橘黃甘隨處好美花香草逐時榮
晚來寒雨催歸騎酷似鄴人接浙行

送朱叔召歸吳中

長憶吳中鳴櫓聲風高月上水波清
臞菴掩映花成聚笠澤微茫烟若城
十載相忘存夢想一帆此去喜歸榮
老來無復尊鱸會尚看驂騑得路行

景孫以婦病稽賞甘嘗蠲之約景盧以詩詰之

鄭莊好客底虛聲藥裏關心興未清應恐被圍因魯酒
也防完壁棄秦城謂德興二客雙螯弗講連宵會千橘誰教
滿路榮見說高臺新斷手何如自索玉杯行

戲景盧

千橘亭前莫聽聲豈無鄴酌和汾清齊武成勅河南王曰吾飲汾清二杯

勸汝鄴酌兩盃輕裾長袖閒列屋碧瓦朱甍高照城臺上金波

催夜集樓邊玉樹待春榮賞花斫鱸言猶在還被題興

誚卻行

盤洲文集卷五

欽定四庫全書薈要卷一萬五千七百五十六集部

盤洲文集卷六

宋 洪适 撰

詩六十二首

隆庭竹至四絕句

憶昨分抄種樹書三荆今古美同株
閒將草木供詩戲
待把漁樵足畫圖

竹里巧傳幽鳥語月臺高視客星
移鄉園何幸立分鼎
鳴鼓鏗鐘樂聖時

斑籜遠移湘岸種，
猫頭亦是渭川孫。
百金得諾今無恨，
千畝封侯不在言。

裝景松篁渾可喜，
忘機鷗鷺不相猜。
南牕情話有時盡，
喚取青州從事來。

答景盧久陰遣悶

幾日思君環珮聲，
方冬天宇未澄清。
衝寒也到臨春閣，
處暗如登却月城。
整頓建瓴愁雨作，
商量設醴卜花榮。
錦囊不用詩排悶，
起看朝雲亦倦行。

喜小隱新得山茶

芳園封植閱年華異卉搜求鬧小車不羨竹林生石竹
獨來茶塢補山茶遊人認柿枝頭子歸鶴求雌葉底花
我去臨川尋玉茗遙將白雪映紅霞

有人以山茶子
為沒蒂柿者

荅小隱惠山茶

何處仙官萼綠華鞭鸞獨御五雲車來從月窟曾依桂
分種盤洲不礙茶枝耐歲寒犀換葉蕊藏朝霧錦羞花
紅顏不逐東君老須著頻來鬪臉霞

荅小隱聞野處開尊

遺我雙魚集棣華尚疑信馬誤隨車
絲聲自是不如肉酒薄須知大勝茶
翠袖明朝看倚竹蘭燈昨夜報開花
飲闌同步曾臺月古堞危亭見綺霞

荅小隱喜得白山茶之報

素質寧嫌潘鬢華來時應有雪盈車
賦傳山谷文堆繡種出麻源韻勝茶
不向桂宮藏玉兔合橫蕊觀儷瓊花
冥搜未獲詩先作駐目輕帆泝落霞

憶東閣手植花木用雍陶過舊宅看花詩韻

分根徙核望春栽曲徑幽蹊手自開今日成林渾著子

花時不折一枝來

雍詩云山挑野杏兩三栽樹樹繁花
去後開今日主人相引看誰知曾是

客移
來

玉茗未有耗而小隱作詩以瓊花為二絕當專
美野處可也

休論官業出金華共樂家林鹿輓車何日尋春攜漉酒
有時留客試搗茶望梅止渴寧非夢却月橫枝始是花

祇恐偏枯慚好句空教步障錦如霞

和景嚴送方蒂柿

萬株紅葉詠光華

昌黎詠柿詩正值萬株紅葉滿光華閃壁見神思

嘉實堆盤

走紺車

柿之七絕其一曰嘉實

方蒂寧同牛奶柿朱脣應笑鳩

上聲

盤茶園官急送須足繭童子爭觀多眼花羅列林珍生

飲興詎思辟穀更飡霞

談苑鶯粟子詩既似柿牛奶又如鈴馬兜笑林有鄰夫自外歸

見婦吹火贈詩曰吹火朱唇動添薪玉腕斜遙看烟裏面一似霧中花鄰之醜婦亦求夫作詩遂改作吹火青

唇動添薪黑腕斜遙看烟裏面一似鳩盤茶柿有青者但堪打油故借用

答景盧懷舊

了無夢寐到京華
來往園林整釣車
緩步競移霜後橘
清談旋碾雨前茶
虛名長媿稱三鳳
舊事休懷判五花
共把詩筒銷永日
喜君襟韻秀朱霞

園中觀種樹

望中赤葉漬霜華
林下徐行便當車
好處見山仍見水
興來呼酒不呼茶
旋移朱橘添盧橘
更揀紅花間白花
出郭最欣塵事少
飽看孤鷺逐飛霞

答景盧報月臺將畢工

新築崇臺款桂華
凌虛如跨白鸞車
西瓜來自余吾水
遠物誰詢悉里茶
不減平泉書草木
更尋南部錄煙花
落成有約

闕

講舞袖還看舉綵霞

答景嚴詠山居夾道種松

投黻歸來髮半華
蒼官怪我出無車
樹當樵徑頻爭席
地接禪房好覓茶
要使行人長蔭樾
不教侍女獨司花
十韋五鬣它年事
會見摩空薄

讀作博

絳霞

和景廬餞朱叔名往宣城

與客窺園春未華也須日昃始迴車松間共賞猫頭竹
酒半先嘗雀舌茶雲覆疎櫺香起篆風侵密坐燭吹花
雙溪疊嶂催行色佳句重吟綺散霞

答景廬

落落喬松說歲華雨鱗霜骨想專車淪脂此地能和藥
結實殊方却入茶村女拾釵分翠葉野人敲粉聚黃花
脩然一徑窮芝嶺曉見飛雲夕見霞

頃年官池陽見九
華山有數松亦結

實乃梁時胡
僧移來者

和景盧雨中歎

工徒滯雨望朝華
好倩泥蠻指日車
末利怯寒先近火
瑞香蒙潤免澆茶
莫嫌雲暗青油幕
尚恐天開端木花
待得嚴霜變陰翳
便須酌酒賞金霞

和景盧喜晴

已看星星點鬢華
戎邊聊出武剛車
天公欲遣風催雪
僧舍方疑煙濕茶
巡圃觀橙無墜葉
隔溪移杏恐傷花

舉頭忽見雲間日急草詩章慶半霞

閩商貨千葉牡丹疑其非而却之併懷藍憲所

許

星文隕石應皇華鵲語參差雨洗車忽報商人緘韋篋
初疑閩產雜官茶栽培况乃三冬月真贗難分千葉花
寧使雙壇且虛左空吟輕日護香霞

羅鄴牡丹詩門倚
長衢攢繡輓幄籠

輕日護
香霞

和景盧詠新得歙縣牡丹

旁搜嘉卉對韶華寶玩明珠燦照車可使東壇無蔓草

如游北苑得名茶

闕

多炊黍准擬襟期共賞花

醉語美人無晚散不教拖帔泣歸霞

李賀牡丹曲美人醉語園中烟晚華

已散蝶又闌又歸霞帔拖蜀帳昏鴉紅落粉罷承恩

野處送百結花

盤屈枝仍墊葱青葉未稀雙銜疑鳳帶百結類鶉衣弱骨長連鎖輕腰孰解圍若教花自在應作綵雲飛

野處送金燈花

銀燈未出有金燈翠葉森森比劍稜待得花光無斷續
却須拈出問鄰僧

和景嚴詠冬開木犀

桂枝冬更好浪蕊到今稀雅韻催吟筆幽香傍舞衣月
分千里影風突百花圍倚策山亭暮寒鴉亦倦飛

和景嚴約賞木犀

藪藪蟾宮桂冬開自昔稀犀通一點骨蜜染六銖衣樽
渌拚深酌爐紅漸可圍賞花宜卜晝莫待晚霞飛

喜景盧有落成瓊樓之約

地近籃輿便心清俗事稀
檐花瓊結佩窓月練垂衣
松竹添三徑溪山豁四圍
落成歌管集仰首暗塵飛

和景巖咏新得葡萄

名傳馬乳久物比

關

醪醖架關鋪薜荔衣孤

根臨水窟竦蔓接籬圍
急釀涼州酒西園蓋欲飛

得洛中牡丹

洛花天下選千里到荒園
望岫方緘恨憑鶯恰踐言羣

芳俱退舍勝日便開樽莫惜詩償債真同香返魂
藍憲所送牡丹道遠失時頗多枯槁

殷勤人有信驚喜得花饒可惜三冬晚來從千里遙根
亥愆潤澤牙蘂頓枯焦儻有更生路寧辭楚些招

荅景韋赴調還家見寄

迎歸烏鵲竟傳聲擺落塵埃襟宇清新桂豈容留帝闕
幙蓮且得近鄉城眼邊觸處梅爭破陌上分行柳向榮
如約速來春可探肩輿須去靜中行

韋弟乘車頻
有可笑故云

許倩遣舟送花栽

雙舟十日涉長湖
瓊斛筠籃且百株
可喜石榴初變白
更驚玉茗不施朱
臨風含笑勞花使
映水分行擁木奴
裝點園林娛杖屨
好來一醉倒金壺

余得圃芝山之麓
去春始治畦徑名曰山居中
為芝榭四楹其秋雙芝產於榭南
今夏復得四本而盤洲亦有其二
因刻詩以志之

山中曾有採芝仙
此日靈根詎偶然
題柱漫將詩紀實

憑欄真共酒忘年
英華可是丘園瑞
造化元非雨露偏
留與山居作嘉話
那甘草木羨平泉

雙溪堂

負郭藏嘉處清溪
夾岸流風漪前後
起雲態淺深浮入
戶松橫岫開窻
摘滿洲心閑身
自在無事底能留

樣齋二絕句

野色山光列畫圖
坐看漁子入菰蒲
恰如放鷁穿三峽
何事航家問五湖

青翰不動柳陰多
桂棹無聲鳥語和
有此孤舟寄丘壑
可憐平地起風波

侶鷗亭

憩策新亭上
波光入坐來
魚遊能自樂
鷗狎肯相陪
風快塵襟豁
雲深俗駕回
尋盟須日涉
未怕落霞催

小隱芝草

芝叢盈百見
聞希不數嘉
禾連理枝
紫蓋堆雲光
點漆金莖
蒙露色凝脂
一時競秀
園林勝十載
深藏天地知

急辦軒楹尊瑞物泥封詔墨有來期

招二弟賞盤洲雙頭蓮

何須艷質鬪鮮粧灼灼紅蕖本自雙却恐花飛成造次
急來相就倒銀缸

紫薇花以六月至自漂陽在道已五十日今有
花滿樹因示二弟

六月炎天千里移不期繁蕊便盈枝向來渾是西垣客
憶得看花草制時

九日欲為雲松之集以病倦而輟

半秋翻藥裏九日負雲松黃菊從他好清尊不我容零
丁憐敗葉旁午羨游蜂今古登臨恨雲迷五老峯

景盧約賞朝天菊不克往

暮節真無分頭風祇自知朝天雖有菊向日不如葵久
旱千株槁深秋百草萎吾衰亦相類飲興謝東籬

除夕

歲盡春雖淺更長夜亦闌枕邊雞送曉窓外鴈衝寒學

圃心常在籌邊力所難老來驚節序那復問椒盤

觀園人接花

植杖看園吏揮斤接果栽奪胎移造化類我借根芽一
似雀為蛤能令桃作梅天工待人力信手便春來

開歲三日有夜雨屢聞雷聲繼以大風晨起飛
雪已盈積景盧作詩即事次其韻

旱灾已嘆失秋成春到誰教夏令行風陣驟來收雨脚
雪花未集聽雷聲陰陽改變纔俄頃冷暖乘除若晦明

待向斜川會鄰曲占晴須問蜀君平

雪後遊盤洲

書事斜川日月同行年過四逼衰翁縱情自洗和陶筆
乘興誰開訪戴逵梅萼僅存難聚雪竹根未穩不禁風
莫將野趣逢人說水上輕鷗西復東

槩齋觀耜

城下經營二頃田倒囊不惜買山錢一犁駐目兩初歇
三徑藏身地自偏乞米帖來須領略相牛經在與周旋

嘗新指擬翻匙雪旱魃誅夷勝去年

景盧新治西園而亭榭未立以詩趣之

斬新曲徑治西園野色春來已可觀
便好作亭供客醉望中流水有時乾

荅景盧和篇

致君無術合歸田誰敢貪榮食萬錢
且對清尊希北海最欣別墅接西偏
轉頭麥隴龍工往緩步花蹊蟻磨旋
辛苦三農營一飽莫教蝨賊壞豐年

上元日圃中歸

春風環柳岸夜雨沒沙痕種竹期新笋移花護舊根身
閒貪獨樂舌在戒多言是處無燈火荒涼一上元

次韻梁憲盤洲之集

輕風吹雨稱行春丘壑胸中我輩人照水軒窓如進艇
穿花旌節屢移輪攜壺漫講三杯酒揮麈曾無一點塵
明日兵廚尋故事已教園吏拂華茵

再和

於越歸來三見春
買山學圃狎漁人
非嫌厚祿輕捐印
所畏空餐詠伐輪
時運可驚如過隙
人生何苦不同塵
明年此會誰重講
唯把書郵問鼎茵

江守置酒盤洲張貳卿兩憲及景盧同集時江

新闕司

皇華分鼎坐添春
隱霧巢松三散人
半月陰雲濃似墨
今朝晴日大於輪
不辭多酌娛浮蟻
何用清歌落暗塵
歸去池塘入新夢
句中芳草醉中茵

金... 卷六

再賦

到處爭持麴米春
闌闌花底湊游人
同盟非是新傾蓋
巧匠誰云老斲輪
倚竹豈無人拾翠
凌波誰想襪生塵
後期直待荷花發
欲喚輕裾上舞茵

醉中三用韻

小車追逐賞光春
花塢行盤走隸人
水面落英如濯錦
雲心初月未安輪
今宵同舉盈觴酒
後夜還凝滿席塵
倒載歸時童稚舞
莫教騶哄滓馮茵

雨中排悶

生怕花飛減却春半旬
苦雨惱幽人
山房挂壁有雙屐
村徑衝泥無隻輪
但見綠波侵碧草
不須皂莢去黃塵
擁爐更闕

轉覺寒威逼坐茵

次韻梁憲再集盤洲

春風步履共優游
雅集園廬匪拙謀
羅列清尊資嘯傲
安排好語待賡酬
霏霏香草裝三徑
恰恰鳴禽想十洲
玉節尋盟端不惡
便回天上近凝旒

浮杯

南北芝泉一澗開
穿花度柳勢縈回
不須元己方修禊
才遇良辰便泛杯
行止豈由人智巧
沈浮長與客驚猜
急流一去誰難進
却有先游殿後來

送吳遠澤赴南宮

文壓秋闈擘桂華
一鳴天陛穩乘槎
歸來須踏盤洲路
要看荷衣醉藕花

九曲有感

忽忽光陰轉駸駸華髮添迹陳三可歎心賞四難兼


歲三日插柳

欲教垂柳匝池臺尋覓長河處處栽待得成陰身益老
攀條能得幾番來

次韻梁子正詠棕亭

鬚得并間製數椽繡衣拈出少陵篇倚楹見水幽情暢
駐屐迷花詩興牽便覺茅軒俱退舍若談竹室不同年
滿山所欠青青藥且趁流觴集醉仙

盤洲文集卷六



總校官進士臣胡榮

校對官編修臣楊壽楠

謄錄監生臣莫漢

欽定四庫全書薈要

集部

盤洲文集卷九

七至

詳校官助教臣謝登雋



欽定四庫全書薈要卷一萬五千七百五十七

集部

盤洲文集卷七

宋 洪适 撰

詩五十二首

梁子正有詩謝牡丹及聚仙花次其韻

陳
天教
國色傲春華不肯爭先伍雜花西洛塵埃長太息
名園今半屬豪家

癡坐林間類守株一年春事已無餘直須九曲添清漲
灑掃機亭進一盃

玉蕊茸茸映四筵團圓如集飲中仙
下方簇蝶非儔匹
上比瓊花難並緣

病中憶九曲

新穿九曲望時霖水到渠成病已侵
見說小舟穿柳岸
那知清漲入桃林
五旬藥裏長經眼
幾日荷花復賞心
夢裏亦知行樂處
老來尤更惜光陰

六月鄉城不雨禱賽無應得
建康書一雨連半
月至以望日
勻晴感而有作

蒼蒼太手熟歲歲厄吾鄉千里均州縣三旬殊雨暘誰
云不私覆迺爾分此疆遂令遠遊子轉盼生炎涼

江鳴玉遺蒼梧二蒼鶴其一病兩日而死陸魯
望詩云醫鶴自須監吾鄉人醫尚無良手况禽
醫乎

病骨摧頽警露難草埋長脰委蒼翰吾鄉尚欠肱三折
况有禽醫為一看

八月下旬觀邸報二絕句

黃卷漫窮年天梯欲上難閭閻聽小子競欲裂儒冠
歎息東坡老聰明誤一生不須多識字捷徑自橫行

婺源乃歛之劇邑素有湯鼎之謗頃治此郡俾
邑官作止沸之亭而不果吾宗應賢下車而風
俗易書來求扁因為賦詩

琴堂少值烹鮮手壯縣空遭沸鼎名止火絕薪俱下策
風移全在長官清

宗人應賢婺源張氏之壻也治邑清介一無所

私其列嶽詒書郡幕至以邑尊稱之其里諺如
此戲成絕句

自昔為門壻于今是邑尊秋毫無假借情話與誰論
朱叔召遺文官花二絕句

幻出荷衣點雪衣更將龜紫換牙緋人中巧宦誰知此
好向天街插翅飛

綠心變却初時白紫色由來昨夜朱學得文官何足道
但堪花徑駭僮奴

再賦

不用風人怨綠衣身兼魏紫與潛緋
司花真為文官地
可忍春殘一片飛

解褐方聞上玉除
寵光轉眼疊金朱
大夫不博喬松貴
嘉橘千頭也作奴

景盧蟻洲

芳洲編地志
老蚌隱澄灣
軒楹今清絕
全勝合浦還

蟻橋

堤長交柳蔭橋狹東荷香掩戶回逋客憑欄狎漫郎
索笑亭思景嚴二絕句

往日江梅發巾車數數來自今花索笑不復共銜杯
常棣春來減人如折脚鐺倚欄思舊事老眼淚縱橫
次韻景盧賞梅

曲塢梅藏白東皇解出奇不嫌歌板闌直與酒尊宜倚
竹盟三友凌風絮一枝清標何水部千古說能詩

石鼓詩

天作高山太王荒鷺鷥一鳴周剪商邠鄘卜年大蒐講
諸侯斂衽尊天王六月中興繩祖武平蕩犬戎恢境土
石崖可鑿詩可鐫千載神光薄西許橐駝輓入大梁都
壁水湛湛河出圖中間兩鼓備章句日惟丙申不糶糊
左驂秀弓射麋豕有鱗有鯢君子漁光和石經屹相望
詛楚登嶧非吾徒辛壬癸申鴈分翅橋門觀者堵牆如
星沈東壁干戈起首下足上天倒置景鐘糜碎九鼎飛
王迹皇風吁掃地北兵扛石徙幽燕兵車亂載包無羶

敲火礪角小小爾為礎為砧多歷年宣和殿中圖復古
冠以車攻次十鼓韓詩歐跋盡兼收雲章剖判定魚魯
先君辛苦朔方歸文屏拱壁棄弗攜一編什襲自鐫秘
更有司馬鳳翔碑我生不辰今已老岐陽三雍身不到
匆匆奉使接浙行在耶亡耶問無報整齊篆籀飾牙籤
簡撮篇詠勞窮探致主有心歌小雅還淳無術卜登三
丙申臘二十五日落一左齒

行年六十已中枯雪映衰髯歲至除一齒驟然離左輔

益憐大嚼遠庖厨

野處孔雀為狸所斃

遠程萬里起南溟文采歲蕤掩畫屏展翼來朝金翠晃
竦身輕舉鵲烏停園中但有辟蛇法山下相望瘞鶴銘
野鷺家雞隨處有孽狐何事獨淫刑

過濠上

心隨溪水清目逆岫雲生不憚躡芳屐橋南鷗乞盟

豹岩之北脩竹數畝中有叢冢數十百處皆紹

興末年所寄予得此地先定規撫某處起亭榭
某處植花木七八年間成畦逕矣所寄之櫬願
移者從之不強也作靈之春有姓淡人來啟敢
是日攜插掘土數尺敗棺俱在朽骨為土所蝕
頗亦不具皆包裹而去後數日忽訴於縣於州
於外臺追問證治踰月始定今不復塞其故穴
欲使孫曾知之故作此詩

未央長樂宮中有槨里墓沈沈天子居咫尺穴狐兔乃

知古聖人如天覆下土雖袒裼裸裎四目曾不顧賢哉

季武子杜殯迫西廡堂皇步武接松檟暗鐘鼓桃李不
屏除芻靈許來祔忌諱後愈多令人不如古曹瞞好發
丘凶德安足取掩骼埋其齒人當事斯語我老得歸田
買山因學圃鬱鬱琅玕林叢冢不知數豈忍去枯骨為
我展杖屨恣其笋侵置不使種瓜瓠花木列四旁亭榭
亦回護數年畦遯成或徙或如故尚有獷悍人珥筆巧
誣訴無言事自明有物衆所覩舊壙今弗堙朽木且支

柱尚恐妄男子輕傳市中虎書事示孫曾無心覓佳句
席上見姚泉壽母諸子求詩

潘輿隨五采三釜古今榮蘭玉盈階砌追攀千佛名
董伯魯以詩送川海棠用韻荅之

花栽趁上春重趼疲雙足何日對仙姿分題同刻燭
次韻景盧題龜巢

拙速誰云勝巧遲新亭結罷得成奇細看遠水兼天淨
可但中秋觀月宜出郭自欣三徑樂枕流今有幾人癡

巢蓮千歲同藏穴一笑泥塗曳尾龜

三月十六日龜巢觀月渭師攜寵同賞後兩日
大雨復作景盧有詩用其韻

潛鱗故故上鈎遲翠袖憑欄自一奇
半夜醉歸閒有趣
一年春盡事如宜盍簪何憚再三瀆
覽鏡堪嗟六十癡
已辨尋盟臨斫鱠不將可否問著龜

四月十三日流杯次景盧韻寄渭師

今年無好雨曲水未勝杯誰伴
山翁醉難令俗客陪青

苔迎馬入綠柳拂人來徐步濠梁上垂緡更樂哉

流杯用景裴韻

三春少雨未行觴槐影交加更漏長半夜水來山澗滿
四簷竹密酒尊涼新亭方作龜巢葉畫棟何妨燕語梁
滿引三觥拚一醉老來真箇惜時光

流杯次日連雨渭師有詩次其韻

入夏濃雲日夕昏舉頭煙雨暗前村風隨重客清葵扇
月為佳人射翠樽依舊建瓴歛屋角幾番攜杖失溪痕

小枰已在紗窓下欲把明瓊看倒盆

趙侍兒覓小棋局次日與之

再答

投老無能千慮昏歸田

闕

今村長因步月成三影

難得朋雲共一樽水漲溪橋孤釣隱雨侵山徑洗鞞痕
寓公在此寧黔突會有容光照覆盆

景盧開尊阻雨辰日復用前韻寄之

逐婦鳴鳩急定昏不堪煙靄弄千村掩闕盡日資筇杖
改席何時對酒樽雲暗松皮多節目雨傷黎頰有癢痕

溪神若也心無滓迎出嫦娥照玉盆

雨中排悶

飯牛戴笠牧朝昏贏得斜陽過別村
戶外涎蝸行半壁
床頭渴鼠側空樽
花殘鶯老渾如夢
水到渠成不見痕
天意未晴人未飲
家奴款曲辦粃盆

再賦

月在雲中破鏡昏
幾時清影散林村
杖藜難去尋漁艇
洗盞無因續蟻樽
竹葉弄風添秀色
榴花帶雨露啼痕

不如醉捲珠簾看
喚取佳人笑拊盆

庚子山居采茶有感

憶昔采茶時
雨後山蹊濕
鷹爪喜盈檐
蠓眼思朝汲
歸路取盤洲
下坂行踪急
珠汗透裳衣
更換登梯級
徙倚曲欄干
鳴鴈圓沙集
晚景不勝春
寒氣潛相襲
詰旦傍粧臺
歌側人扶立
興疾望醫來
誰煮青黏汁
舉按念齊眉
幻泡何嗟及
重返故園門
不忍攜筇入
引領顧前丘
空對旗槍泣

一春置酒必苦風雨今日幸晴而景虛有行色
一春風雨厄遊遨此際開尊始解嘲恰恰鳴禽藏柳陌
訢訢嫩葉迸花梢離筵欲動愁分袂勝日何妨剩出郊
燕寢香凝公事了頻將書札問龜巢

次景裴席上韻

桃李紛紛已半春海棠睡覺晚粧新龜巢剩有千般景
瓊宇渾無一點塵酒未舉杯風逐客詩方拈筆雨催人
從今只揀晴和日草草杯盤勿厭頻

用景盧諸公詩軸韻招監司太守

淺白輕紅笑倚門何須雪夜憶前村韶光定入詩人句
勝事難逢俗子言風振繡衣須命駕雲隨皂蓋欲窺園
人生易老愁春老問柳尋花故事存

景盧數日枕疾復用前韻

半載悠悠只閉門不知紅綠遍千村山川滿目供良境
桃李成蹊出怨言可惜花飛聊洗盞何期雨作阻行園
車公不出須重講檢校芳菲心興存

答景裴

春來啄剥少登門
澁雨慳風笑我村
橋上垂綸裝好夢
花邊倚杖記前言
長楊美竹雖當戶
語燕流鶯不到園
此會明年千里隔
詩筒猶有置郵存

席上遺景盧

白髮歸休慷慨生
棣華酬唱得娛情
雙旌欲指閩中去
三徑誰同月下行
蕙帳風寒知鶴怨
蘋洲波細憶鷗盟
新壇留得人千里
不盡相思淚睫橫

枕上示景廬

朱幡皂蓋有行期
暮景無情惜別離
枕疾半旬乖語笑
急風吹雨淚垂垂

南憩番禺北抵燕
片帆西上駐荆門
平生不作東甌夢
荔子丹時未敢言

荅太守謝牡丹

華髮歸來不記春
優游學圃傲江村
已欣勝日臨千騎
漫折香霞佐一尊
對竹便當尋水曲
藏花那肯效慈恩

行厨若有真消息奔走畦丁急掃門
劇談錄唐慈恩院浴室有鞞紅牡丹
一窠千朶不使一見會昌中
老僧漏言為朝貴強掘去

懷景盧

菖蒲節近暑風高常棣叢疎月影交
清夜不曾空鶴帳
浮生何幸老龜巢酒盃獨引今無侶
書卷閒開共苦抄
想得公堂見鶩遠須懷西塢欠誅茆

答徐守

改日開尊已十成冬曦闕地晚來晴
江梅獨報春消息

應笑羣花太薄情

不教絲竹禱曾臺
促席飛談懷抱開
夜半夢回聊趁韻
愧無好語答瓊瑰

排悶

數日雷中雨凝寒

闕

頭出遊閑豹舄危
坐索狐裘怕

冷杯常執扶衰杖
屢投滿園冰木稼
天遣阿誰憂

雪中歎

連綿春雪助凶年
入地盈庭大可歎
詞客罷吟梅散漫

園夫慚報竹平安烏鳶腹餒飛穿屋牛馬毛寒病倚闌
天意欲添埋殍野四時玉燭古來難

答裴弟

常棣成陰慰暮年因人春雪好長歎閉門終日詩頻和
伏枕盈旬病未安已遣攜鋤移竹徑更思杖策整花欄
飽聞冰下游魚躍所恨雙溪一笑難

憶昔

跨馬春衢裊翠鞭垂綸圯下解漁船霞飛綺散無蹤跡

依舊清宵月在川

寄景盧時往豫章

聞得茶蘼語牡丹蜂回蝶散恨春殘西山挂笏晨光爽
北海空尊夜漏寒徐孺堂中同下榻滕王閣外久憑欄
歸來已失蘭亭集照眼榴花待細看

辛幼安稼軒

濟時方略滿心胸卜築闕城樂事重宣是求田謀萬頃

聊因學圃問三農高牙暫借藩維重燕寢未須歸興濃

且為君王問再造
它年植杖得從容

盤洲文集卷七

欽定四庫全書薈要卷一萬五千七百五十八

其部

盤洲文集卷八

宋 洪适 撰

雜詠上詩一百一首

山居

經始得山居幽尋跡不疎自開溪上徑花露泣前魚

竹坡

有圃無修竹其如借宅何寧忘三月味不厭此君多

芝徑

金華豈受塵三秀已通神不競銅池瑞逢蘭肯卜鄰

種秫倉

種秫無多子猶勝避俗翁盡將供釀具不復用青銅

芝泉

美瑞山祇管幽泉地脈通漱甘冰慰齒短綆走溪童

兌橋

橋橫桑下澗望處極西郊有客同飛蓋何人伴結茅

泛杯巖

酒進盧鷺杓花隨翡翠盤巖邊多怪石巖下有奔湍

九曲

風輕杯蕩漾岸曲水逶迤遇坎亦可喜倒行羞接羅

稜亭

乞得并閭葉都將當屋茆青青夸藥甲可怕杜陵嘲

一詠亭

有水足浮醴寧拘秋與春共將詩擬古不必語驚人

小垂手

九曲二石

醉袖起如舞翩然三島仙約君為石友伴我做林泉

醒酒石

平泉醒酒石以水沃之有林木自然之狀

名高牛氏品地接燕兒窠有客圖沈醉翻嫌石是魔

墨沼

鑿池肖風輪洗雲吞月扇敗墨起緇塵山陰勞北面

既醉亭

酒半興方沒銷空壘弗恥更看一籌輸各盡三觥醉

溪簾

雨過溪添綠橫瀾自在流水精簾欲捲何處著銀鈎
可止亭

循除泉漱石改席酒分船到此須知止行前將墜淵
鵝池

路轉左畫方水來斜中矩不解寫黃庭倚筇看白羽
流瀑

高坡勢建瓴觸石驚濤沸入耳轉聲清廬峽參差是
蒼葛澗

夾澗芙蓉菊倚竹顏如玉溪魚大上時臨流香可掬

菊澁

夕英色哀落小摘尚盈襟錯會離騷意元無滿地金

末利菊

化工將末利改作壽潭花零露團佳色鵝黃自一家

雙溪堂

溪光搖四壁瓦影落中流洗耳百聞寂清心千慮休

穢齋

隨波堪泛宅，因壑遂藏舟。
坐穩無維楫，任他風打頭。

雲葉

雙溪四石

支機何代石，風截秋雲根。
一葉下人境，坐令臺榭尊。

嘯風臺

於菟嘯空山，萬竅寒風出。
隄防飛將軍，漢箭有神物。

蜂房

石是蜂窠變，蜂來有處藏。
不須開戶牖，薜荔為穿房。

磐磯

有竿不見綸無綸馬用餌終日坐釣磯旁人笑兒戲

問柳橋

濡毫求露柱墮履望奇書問訊緣溪柳新條可拂裾

鳳柳

春情百尺牽午影三眠過修眉漫成顰細腰誰類我

蓼岸

岸蓼花如糝殘霞照晚汀不教資麴蘖留得隱鷓鴣

碧蘆步

津頭晚風急，欹倒一叢蘆。
宿雁逢清泚，飛來作畫圖。

西汧

春馮西汧窻，夏卧西汧榻。
待月最宜秋，採梅還度臘。

扁舟

非厭人間事，不攜西子游。
聊將去越意，指此作扁舟。

飛廬

浮家今得計，舉棹疾於飛。
一笑兒童舞，芳蓮當妓圍。

采蓮舟

賸得三峯藕剝為一瓣蓮著身猶不穩何用濟長川

彩鷁

興來飛畫舸汎汎水中鳧綠皺移歌扇紅鮮迂酒壺

飯牛亭

冬耕春復犁麥秀禾方插少放牧兒休莫教牛力乏

西疇

代耕荒幼學投老樂歸田鹵莽人之罪豐凶勿怨天

土湖

波濤送客帆松竹圍僧舍野趣望中來西湖當減價

石街

竹弟石兄出
玉川子詩

一丘封竹弟萬石齒金昆收拾甲乙品莊嚴可款門

有竹軒

前身豈汲直枉尺天所難賢哉耐久朋結盟同歲寒

斑竹

帝子登湘岸臨風粉淚彈梨花多少雨點點透琅玕

紫竹

拾青容色混著紫寵光偏幽逕留風月行多履易穿

方竹

體方如就矩幹直匪從繩杖有削園厄提攜先摸稜

人面竹

怪奇存相法妍醜出天真此君無二貌正是葛天民

貓頭竹

穹枝迴鳳尾健筍迸貓頭安得真致此勿為羣鼠羞

慈竹

義居傳九世瑞物記三荆何似同根竹春風一死生

笛竹

斲產名天下含颺別樣青中郎如一見應不數柯亭

箭竹

美箭東南出成林地不慳化工如有意寄與定天山

洗心閣

殮霞吞沆瀣一吸千頃湖默坐更深省心塵今有無

橘友亭

倚檻歌橘頌巡圃款甘林更待商山老於斯朋盍簪

繡橘

后皇權植物奴婢徧江干繡蹙一林橘高擎黃玉團

脆橙

謂橘不盈握勝橙頰進皮香蘢難共搗遮莫蟹螯持

金橘

道州者

朱襦千里變金彈一分增入口蜜相避懷歸誰不能

羅甘

羅包肌理細霜顆輔車香封殖貴瀕水踰淮非我鄉
常棣徑

已廢蓼莪篇難荒常棣徑步履不思歸共看花弄影
花信亭

時時風報信處處雨催粧大賚一年景均輸萬斛香
牡丹

綺麗偏宜晝香霞獨占春洛陽荆棘久誰是惜花人
芍藥

名標溱洧贈根自廣陵分所欠盤盂玉黃樓儘不羣

丹桂

無癖不譽兒有詩非責子丹桂幾枝芳對之空額泚

瑞香

紫苞楊柳葉奇絕錦熏籠香氣闌襟袖清尊為汝空

白山茶

亦曰玉茗

自讀文成賦經營巧作難涪翁真溢美何似鶴頭丹

白榴

恥上舞裙帶願依九琳窻韶顏今換骨阿措使心降
末利

膚瑩過凝脂香濃遠隨步應有看花人入園心見妬

素馨

繁盛閩南粵潛藏霜雪天素雲生寶髻賸馥借龍涎
含笑

自有嫣然態風前欲笑人娟娟朝泣露益益夜生春

木犀

逋客敢欺桂秋巖曾遣風古香吹一再如到廣寒宮

文官花

破白便懷青紆朱旋著紫鼎鼎一春忙浮榮均夢蟻

聚八仙

圓整裝花蕊周遭列飲仙瓊英難上僭簇蝶不同年

袞繡毬

流蘇團小蝶伯仲聚仙花袞繡名非是瑤琨未足誇

水梔

鮮支即支子
出子虛賦

鮮支形相小石罅解蟠根香湊芝蘭室居便水月村

重杏

重英迷宿雨巧笑聘春風壽汝一卮酒勿嫌肌太紅

紫薇

十年三鴈序接翅紫薇垣花下哦前什難酬明主恩

木蘭

未識春風面先聞樂府名洗粧儂出塞進艇客登瀛

茶蘼

青條散蛟螭素艷欺瓊玖體薰塵外香骨醉壺中酒

玉瓏鬚

此花得之臨川謂之玉堂春或云閩中謂之玉瓏鬚浙中謂之睡梅曾鞏有霧

淞花詩云園林初日靜無風霧松花開處處同記得集英深殿裏舞人齊插玉瓏鬚疑即此花也

品軋醪醪架名疑霧淞花玉堂應假借可但鄙金沙

山茶

劇談錄載李德裕平泉莊有題詩曰隴右諸侯供語烏日南太守送名花

平泉窮勝事南守送名花寓意懲多愛勞人召怨嗟

黃薔薇

彤闕收紅綬金門賜鞠衣闕無纖刺胃一摘便須稀

紅蕉

嶺外花無數分移頗歷年破除猩血染舒卷蜀城牋

海仙

本名錦帶

人來認海棠却訝枝條弱嫩蕊不勝春生怕東風惡

繡帶

蜀艷停針久柔莢著意描五文縈色線百寶簇芳腰

豈蔻花

金日... 卷八
治葉擁香苞盈盈二月交相思意安在試去想花梢

麗春

織筵小作罌瘦殼元無粟色麗品少雙詩成看未足

長春

四季花長發朝朝得細看絳英能受暑綠刺更禁寒

水仙

龍宮陳酒器金琰白銀臺欲結塤簾伴無踰綠萼梅

剪春

巧剪鮫綃碎深塗絳蠟勻殘英枝上隱踰月逞鮮新
玉簪

月娥新琢玉何夕忽遺簪斜插風鬟濕蟾宮底處尋

麝萱

手撚雛鶯羽鼻參香麝臍千憂何處散芳徑酒爭攜

玉燈

葉如蕙以長花比金燈白一簇蕊宮仙銀燈臧與獲

鬪日紅 一名落地錦

紅英鬪日開暮落錦成堆不藉西風力孤根委草萊

佛桑

展葉柔桑沃裝叢醉纈繁定應西域到略不耐輕寒

木芙蓉

離騷采薜荔兮水中零芙蓉兮木末蓋言水中無薜荔可采木末無芙蓉可零

猶緣木求魚之意與古詩涉江采芙蓉皆指藕花也韓文公木芙蓉詩云采江官渡晚零木古

祠空乃

誤用耳

川陸有芙蓉名同物不同采江零木句作麼誤韓公

黃拒霜

芳林秋冷落木末改黃裳可笑名虛忝何曾拒得霜
小黃葵

拂金鋪細靨騎鵠墮新翎花小也傾日芒寒猶聚星

金鳳

九苞滋雨露五采燭軒楹奉送歸丹穴朝陽幸一鳴

雞冠

未觀金距鬪已怪左輪殷一夜風霜作垂頭急挂冠

石竹

文與可詩蜂齧紅蕊爛蟲啼碧叢短

鷓紅蜂好齧路細麝來眠若也栽幽處踰冬色不凋

黃鶯兒

鷓庚翻柳去拾羽漬輕花戰戰枝如壓無風勢亦斜

真珠

細簇盤洲岸初驚合浦還娉婷邀十斛借取買青山

鼓子

抽蔓類牽牛含芳伍萱草上上不知休高柯厭纏繞

金錢

鑪熾陰陽炭金錢滿地流何人能點鐵笑覓富民侯

盤洲文集卷八

欽定四庫全書薈要卷一萬五千七百五十九

集部

盤洲文集卷九

宋 洪适 撰

雜詠下詩九十三首

金燈

燈焰既埋光幽蕤不露黃阿誰驢喚狗為我問花王

百結

體輕難受雨枝軟不禁風全賴結蟠力能超造化功

後庭花

月滿臨春閣雲隨張麗華隔江雖度曲破國不因花

凌霄

天借憑依便雲霄若可凌莫教風拔木却羨水飄萍

杜鵑花

山深啼杜宇濺血染花心閨苑未歸去不妨留鶴林

玉胡蝶

贊皇褒簇蝶京洛古來希一陣雄風起穿林粉翅飛

苔

亦名綠錢陸龜蒙石竹詩而今
莫共金錢鬪買斷秋天是此花

最憎賓舍滿雅稱落花留縱使金錢好如何買斷秋
虞美人草

尤物鍾芳草虞兮奈若何動搖緣體弱非是感悲歌

睡足亭

露重宿粧凝地偏春睡足卜夜到橫參却須高舉燭

黃海棠

漢宮嬌半頰雅淡稱花仙天與溫柔態粧成取次妍

垂絲海棠

脉脉似崔徽朝朝長看地誰能解倒懸扶起雲鬢墜
孤松

昂霄蒼鬣五獨立幾寒暑不肯在雞羣自然羞嚙伍
菱灣

食芹知獻君嗜艾不忘親大節全忠孝勞心思古人
焚曲

焚槃平甯水雁喙飽吞風剖蚌珠驚坐清談拳屢空
林珍亭

主林時獻供它壤昔移根秋後收梨栗傾奩得弄孫

櫻桃

園官來獻熟萬顆滴堦紅綠李高名品須知論未公

蒲萄

虺蔓奮長須累累明月珠休傳釀酒法萬一誤分符

雪梨

魁然釘坐珍落日雪分身酒渴思吞海加籩縱吏人

鵝梨

新鵝借顏色甘蜜添滋味憶得賞花時闌干帶春淚
林禽

蒙潤碧千顆迎曦紅半頰閱古憇鵝池牽連青李帖
竹村

一任筍侵疆何妨鞭礙道千戶廣侯封三家結村保
竹屋

棟梁無一木眼底盡龍孫千畝清陰合出門人灌園
灌園亭

好手善和羹，非才當抱甕。加點首荷盤，丁寧及時種。

西瓜

癸亥年先公自北方帶歸

萬里隨邊使，分留三十年。甘棠遺愛在，一見一潸然。

罌粟

美豔亞群花，千罌倒儲粟。飲客醍醐漿，可以代醪醎。

瓊報亭

珍物再三投，英瓊修永好。以茲君子德，不作衆人報。

木瓜

碩果宣城得花膚易地無上樓要脚健不假瘦籐扶

矮桃

結子卑枝繁成蹊長策捨飽殺騶朱儒誰牽果下馬

崑崙桃

滿樹鳩上聲盤茶曾開勝錦花奪胎春薄相刻畫攪詩家

朝天李

長柯渾直上茂葉不橫生縞夜心傾藿朝天荷美名

破核李

葦綃歌鼠穴翠質臨糟井自破核不鑽通行冠可整

嘉慶子

壬午年仲弟奉使遇
此果熟帶其核歸種

雪艷燕脂萼京都核遠來遊人初識面不作李花猜

蘭甕亭

倚檻課條桑作繭看成甕我亦効吳蠶踏破愁清夢

沃桑陌

植桑非一日斬伐良不忍亦欲後人知愛奇仍務本

六枳關

分付司花女誰何六枳關少年輕薄子驅去勿教還

碧鮮里

勁節舊梢雲新添老大根何年居此里著處長兒孫

柞林

柞樹何人種成林不亂行漢家全盛日宮殿對長楊

桃李蹊

粲爛九張機交加五雜組蜂蝶勝於人東來又西去

凌風臺

老根呈冷艷鼎立傲剛風危坐層臺久衰顏得酒紅

蒼鶴

吮赤羽毛蒼華亭雪羞此昂昂警露仙翻作遼東豕

馴鹿

呦呦忘野性掉尾草中眠寄語射生戶深山空歲年

猿

擲果心頻喜攀條臂暗通有懷清遠峽雲斷玉環空

野綠堂

緣流排勁草盈野鞠長蘆烟樹高低見如開平遠圖

壁立萬仞

野綠五
石屏

立壁無蹊徑纖塵不可留若知心匪石那復為身謀

千巖萬壑

屏開山弄巧巖秀壑爭流漫作剡中夢難尋雪夜舟

橫坤一練

滄浪東入海神禹了天功誰解聞雞舞來招擊楫風

疊嶂

愚公移壘嶂神助到盤洲
細問昭亭路今非風馬牛

月娥留照

星稀天隕露山靜谷生風
萬古雲中月炎涼無異同

隱霧軒

平昔慕文豹管窺纔一斑
誰言披宿霧吾欲老茲山

豹巖

九仞基人力千峯奪地靈
日長頻拄頰霧暗可藏形

楚望樓

魯詹尊岱嶽楚望指江流地占山川勝小哉雲夢游

巢雲軒

羗廬騰爽氣非霧擁樓居夜鶴能知我鷓鷯堪起予

駐屐亭

長林勞屐齒植杖解冠衣覓句題青竹不知孤鶩飛

郊扉

尺五蟻洲境繩樞每日開抱關無約束俗駕望風迴

濠上

大魚緩揚波小魚輕觸芟魚樂我能知我來魚不避

野航

短篷收楫擢欄楯占濠梁受得兩三客更添垂釣郎

龜巢

眼看蓮葉巢藏六可論交但得滄洲趣何嫌蝮蜓嘲

魚

心嫌大吞小不忍喚漁蓑皺月年年減潛淵漸漸多

白龜

張籍詩天欲雨有東南
風南溪白龜鳴窟中

往作清江使身遭七十鑽南溪今自在魚鼈報平安

綠毛龜

青髯千歲壽綠髮九江希巢葉相漸染沙邊曳水衣

澤芝亭

花開常比兩葉巧或盈千獨步南風裏繁英媿在前

雙頭蓮

駢花先總角一體素同心可是鴛鴦瑞于飛幻碧潯

重臺白蓮

綠房韜紫的玉片踴重葩公論評優劣難私解語花
多葉紅蓮

步有凌波襪掌為承露盤尚嫌花片少千葉映朱欄

槐

花黃秋欲半昔歲一番忙謬應魁三象深慚王氏堂
流憩庵

日日來無數周流足也疲安排憩策地准擬曲肱時

欣對亭

臨清莫三歎對景非一欣
緩踏溪南路怕驚鷗鷺群

錦雞

冠距山雞比誰來
斷蜀機杼兼衆采似戲老菜衣

鴻瀨

籠寬毛不損境熟意能馴
自得寒江樂何憂采捕人

拔葵亭

屋中饒菜把足以給盤餐
不逐露葵去定遭修竹彈

容膝齋

寸地有別天斗牖無長物吾身容易安此膝不可屈
芥納寮

地戰兩蠻觸氣吞九雲夢何以納須彌是中甚空洞
夢窟

世事一場夢山樓冬復春花邊侶胡蝶不省宰官身
椽

剖心青掌露蓬首紫髯垂花孕魚堪饌枝重鳥不窺
木竹

竹葉木枝柯葱青光可鑑桃竹最名浮自知瀟洒欠

蘭

清馥畏人知辭山便泣歧請將紉雜佩不去傍蛾眉

藥畹

自笑桑榆景猶貪草木滋烟霞成痼疾良藥豈能醫

仙茅

臨江許仙觀所出庾嶺亦有之羊食之者為乳羊

許仙初拔宅靈草迸香茅能使羊無血云何命在庖

黃精

一名鹿竹亦名菟竹

葉細渾疑竹叢最輕卻象花果然能辟穀誰不護萌芽

薜蘿 其根苦

菲菲芳襲予采采葉敷碧捐軀陸羽經拊口陳琳檄

芷

為愛草中香靈均詠葯房行山踏虵虺繫肘有名方

地黃

塞耳可治聾下咽多去病九曝不辭勞蚤衰諳藥性

茱萸

覽盡輞川圖擊節茱萸泝九日秋子來黃花為酒伴

玉虹洞

天晴玉連蜷洞邃香吞吐趨逐牡丹時游人推不去

綠沈谷

杜詩苔卧綠沈槍皮日休竹詩一架三百本綠沈森冥冥

塞翁馬論谷山房谷名竹千駟後無聞一竿清亦足

聚螢齋

廣野螢如織涼郊書好觀借光須繼晷莫遣案頭乾

螢

得夜不韜藏飛星亂草塘都緣光影誤無路出書囊
美可茹亭

勿誇萬錢食可畏五鼎烹采山逃後悔碧澗有芹羹

蕨

塊破擎拳出盤行轉眼空掬荒非小補粉骨不言功

辛卯

大荒村人掘蕨根搗粉謂之烏糯賴以脫死者甚衆

薺

犯寒青匝野信手各盈襜不與草爭長聽教荼比甘

筍

出殺瘞五皮獲麟髡一角煮箒太愁生非關渠善詭

雲起亭

水窮雲四起出岫本無心莫負蒼生望須為旱歲霖

西戶

行樂惜分陰或風雨有疾細數一年中戶開能幾日

草塘

茸茸春草茁碧水涌方塘入夢無佳句看雲憶對床

魚臺

掩闕麾俗子裂網禁蛙丁臺下魚相賀溪邊人獨醒

芝榭

築榭芝山麓仍年再產芝欲求茹芝法已與赤松期

樵徑

松釵藏曲徑林浪積枯枝足了園炊用何須壞廩虀

茶丘

半世別玉州夢憶仙人掌經丘獲鎗旗清思飄雲上

栗嶺

霜粟大如拳，皴開穰獻熟。借問嘉卉山，何如白鴉谷。

茅軒

翦茅聊復爾，步屨欲何之。風捲三重去，危簷雀護兒。

蜂廬

分去聲窠能擇地，識路自尋花。不候譙門鼓，羣飛晚趁衙。

情話齋

意到非饒舌，情親易解頤。或時鐺脚坐，不効劍頭炊。

榴花城

榴艷對枯筇西來解后同折花羞鬢白未插已顏紅
錦被堆

錦衾鋪綠野山麝可曾眠蕙帳塵疑席花殘鶴惘然

蘋桐 一名百日紅

花涵百日紅色到三秋重葉大好題詩叢卑難集鳳

雙魚

犀角透魚龍石肌蘊星斗亦有無情花枝頭魚貫柳

薔薇

竹外霞為幄花間錦作籬離宮多怨女吃吃竟亡隋

迎春

一名黃雀兒

桃杏正酣酣光春當仲月吐艷既後時嘉名安可竊

長生草

經時久枯槁得水即青葱起死醫無藥返魂香有功

雲松關

葉生新易舊歲寒凋獨後不改四時柯賢言非聖榻

山礬

藥碎葉傷多風韻弗娛目獨抱絕塵香無心出幽谷

躑躅嶼

一氣浹羣芳漫山躑躅黃有誰相領略自解度春光

野草

發生寧有種滋蔓妨人路不得十月霜掃除難盡去

盤洲文集卷九



總校官進士臣胡榮

校對官編修臣楊壽楠

校對官庶吉士臣章宗瀛

膳錄監生臣莫漢

膳錄監生臣張迺理